

題倪耘老湖樓茶話圖時耘老將北上即送其行

金陵自古帝王州，胡乃陷賊一十有二秋。湖山百戰幸無恙，六朝金粉洗盡古今愁。桂林才子倪耘老，翩然忽作江南游。頭銜久已經七品，眼界何止隘十洲。萬人海中作厲公，題詩乞畫多風流。瓜皮艇子尋煙語，渡湖直上中山樓。樓中清話上下三千載，明湖一吸痛飲茗百甌。兒女多情化黃土，英雄失意空白頭。一指禪成三字謎，趙州和尚「吃茶去」三字，此禪家隱語也。語言文字難推求。竭來南還客滬濱，與我相見堂南陬。初見於唐景星觀察席上。神交廿年今始面，行篋尚有尺書留。余曾有書致君，以君改官閩省未達。君才倜儻素傾倒，愧我蹤跡時沈浮。雲萍海上得相聚，袖出圖畫驚雙眸。我詩豈足污君聽，如以瓦礫儕琳瑯。溯我前游在丙午，荻花楓葉艤輕舟。雕梁風月娛棲燕，遠浦煙波穩夢鷗。曾幾滄桑增感慨，湖樓誰復聞清謳。倪迂好游兼好事，補圖索咏煩窮搜。此才不屑詩人列，文章卓犖媲枚鄒。幕府徵辟掉首不肯就，峻嶒傲骨意氣凌諸侯。邇年足跡半天下，今將北行燕趙參前籌。屠沽中或有奇士，君其物色休輕投。詩成即以送君行，還期君來互倡酬。約往莫愁湖畔住，景物都從百尺樓頭收。

【校】

「一十有二秋」，《弢園詩詞》稿本作「一十有三秋」。

送友北上

送君北去意無聊，擊筑狂歌氣自豪。久棄冷官慚苜蓿，好傾美酒醉葡萄。齊煙俯視人襟袖，燕月生涼湧海濤。底事樓蘭多跋扈，腰間笑指遏隆刀。

【校】

此詩亦見一八八四年七月七日《申報》，詩題作《同人公餞唐君芝口北上謹呈一律送行》。〔腰間〕句《申報》作「腰間自有必隆刀」。

閒居感事四首即用自粵歸吳原韻

養病歸來學閉關，投林倦鳥久知還。自憐主簿才俱短，莫笑參軍語帶蠻。誰挽狂瀾迴宦海，群趨捷徑借名山。餘生一掬憂時淚，翹首天風想佩環。